

# *A Estrada, Miscelánea Histórica e Cultural*

## 25 anos

Non existe magnitude máis caprichosa que o tempo. Dous anos de felicidade poden pasar como un lóstrego e un día de infortunio resultar interminable. Cantaba Víctor Jara nunha fermosísima canción que *la vida es eterna en cinco minutos*. E se, na metáfora do poeta, cinco minutos poden ser eternos, imaxinen vinte cinco anos na prosaica vida real, tan orfa de poesía.

Cando viu a luz o primeiro volume da nosa *Miscelánea* os teléfonos móbiles eran uns cacharros voluminosos e con antenas, que recibían o irónico nome de mancontros. En 1998 non existía Facebook, nin Twitter, nin Instagram. De feito, en 1998, Internet era aínda un meniño de oito anos ao que lle quedaba moito caldo por comer, se tomamos como a súa data de nacemento a invención en 1990 do protocolo http, catro letras que hoxe son unha icona do século XXI. Lonxe de permanecer allea ao desenvolvemento das novas tecnoloxías da comunicación, a *Miscelánea* estivo á altura dos tempos adaptándose aos novos dispositivos da expresión cultural e do acceso aberto á cultura. Primeiro co acordo asinado con Google Books, para o aloxamento dos contidos no principal motor de busca da rede, e despois coa implementación do portal dixital de investigación e divulgación na web do Museo Manuel Reimóndez Portela, a revista deu un exemplo de modernidade e altruísmo, poñendo o seu enorme acervo de artigos ao dispor inmediato de calquera interesado desde calquera parte do mundo. Un paso de xigante.

Na súa viaxe a Ítaca, Ulises non pensaba no destino senón no camiño, nun camiño cheo de novas alboradas e experiencias. En 1998, ningún dos que entón promovemos o nacemento da revista podíamos prever o seu destino. Pero, vinte cinco anos despois, si podemos gabarnos do camiño percorrido e manifestar publicamente o orgullo de termos consolidado un proxecto cultural de grande altura, con poucos parangóns posibles na súa categoría. Neste número incluímos un exhaustivo percorrido de títulos, temas e autores da man de María Carbia Vilar que, a través dos correspondentes índices, dá cumprida conta do empeño e compromiso de tantas amigas e amigos que, coa súa achega nos máis variados eidos temáticos, contribuíron a apuntalar o referente de primeira orde sobre a nosa vila e a súa terra que hoxe é a *Miscelánea*.

Neste aniversario de prata toca, simplemente, dar as grazas. A todas as autoras e autores pola xenerosidade intelectual de compartiren os resultados da súa desinteresada investigación e ao Concello da Estrada, pola súa confianza e complicidade nun proxecto que coloca A Estrada no universo do coñecemento.

Por outros vinte cinco anos.

JUAN ANDRÉS FERNÁNDEZ CASTRO  
Director